

Augenmaß zur rechten oder lincken wenden / auch auff oder ab mit dem Schliessen oder Winden richten biß daß man durch deß Quadrants Löchlein / vber dem Rämlein von Kreiden oder Wachs den Scopum, Zweck / oder Ort siehet / so man gern treffen wilt / da du denn vermeynst die Büchsen sey iust vnd wol gericht / so nim fleissig achtung auff diese zwey Dinge / nemlich / Wie die Büchse nach der Höhe gericht sey. Item / wie sie nach der Seiten stehet / dann die ganze Kunst recht zuschießen darinn gelegen / daß man nicht zu hoch oder zu nider / auch nicht zu weit zur rechten oder lincken / sondern das Mittelpunctlein oder Zweck treffe. Die Schuß von hoch oder nider muß man also obseruiren / sihe innwendig auff den Flügel oder halb runden Bogen dieses Quadrants / was Zahl von 10. bis 50. das Magnetkästlein mit seim Spizlein in der Figur / Num. 4. mit B. berührt hab / vnd wird gemeyniglich solches seyn in dem Flügel / so nach dir zugewend / dann es selten im andern Flügel / so von dir sieht / obseruirt wird / Es were dann / daß man von einer Höhe gen Thal schiessen wolte.

Solche Zahl dann / so das Spizlein B. deß Magnetkästleins berührt / schreib auff / oder steche mit einer Stecknadel allda ins Wachs ein Punctlein / so kanstu es nit vergessen. Als dann nim auch achtung zu dem Seitenschuß / nach der rechten oder lincken / auff welche Zahl der 64. (so vmb vnd vmb deß Magnetkästleins stehen) die Magnetnadel / mit ihrer spizigen Linien berührt hab / vnd schreibe die auch auff / oder steche ins Wachs / so vmb vnd vmb die Nadel ist / mit einer Stecknadel / auch ein Punctlein. Ich seie zum Exempel / da alles fleissig gericht ist / so berührt das Spizlein deß Magnetkästleins B. im halben Bogen / die Zahl 9. da mache dann ein Löchlein ins Wachs / so ist die Spizen der Nadel auff 55. gefallen / da steche auch ein Punctlein / da man alsdann loß gebrannt / befinde daß ich zu sehr vnter der Scheiben zur rechten Hand geschossen hab / also daß es zwey Fehler seynd / zu ndrig vnd auff der Seiten zur Rechten. Solches zu bessern /

thu